



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 422;
fax. +387 33 726 414
e – mail: info@voda.ba

Broj: **UP-1/21-3-40-299-4/22**
Datum: **03.10.2022. godine**

„Agencija za vodno područje rijeke Save“ Sarajevo rješavajući po zahtjevu pravnog lica „Sagra“ d.o.o. Gračanica za donošenje rješenja o vodnoj dozvoli za ispuštanje oborinskih onečišćenih voda i aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u postupku rada pogona za proizvodnju betona sa pratećim objektima i sadržajima izgrađenih na zemljištu označenom kao k.č. broj 3236/1 i 3236/4 K.O. Stjepan Polje, Grad Gračanica, na osnovu člana 139. stav (1) tačke 3. i 10. Zakona o vodama („Sl. novine Federacije BiH“, br. 70/06) i člana 200. stav (1) Zakona o upravnom postupku („Sl. novine Federacije BiH“, broj 2/98, 49/99 i 61/22), donosi

RJEŠENJE **o vodnoj dozvoli**

1. Pravnom licu „Sagra“ d.o.o. Gračanica daje se vodna dozvola za ispuštanje oborinskih onečišćenih voda i aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u toku rada postrojenja za proizvodnju betona sa pratećim objektima i sadržajima izgrađenih na zemljištu označenom kao k.č. broj 3236/1 i 3236/4 K.O. Stjepan Polje, Grad Gračanica.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola od strane drugih nadležnih organa, a sve u skladu sa važećim zakonskim propisima, uredbama i dr.
3. Rješenje o vodnoj dozvoli je doneseno na osnovu pregleda dokumentacije kojom raspolaže podnosilac zahtjeva, izvršenog uviđaja i utvrđenog činjeničnog stanja na objektu i pod slijedećim uslovima:
 - 3.1. Da se upotreba i korištenje predmetnih objekata vrši u skladu sa njihovom prirodom i namjenom te u skladu sa uslovima iz ove vodne dozvole.
 - 3.2. Da se objekti čija je svrha odvođenje i prečišćavanje onečišćenih voda (betonski taložnik, betonski kanali i slivnici, kanalizaciona mreža, kontrolni šahtovi, separator ulja i masti i dr.) redovno održavaju i koriste na način koji će obezbijediti njihovu potpunu ispravnost i funkcionalnost.
 - 3.3. Da korisnik poslovnog objekta za sve vrijeme trajanja ove vodne dozvole obezbjeđuje da se vode od pranja tehnološke opreme za proizvodnju betona, mješalica i miksera za prevoz betona i oborinske onečišćene vode sa radno-manipulativnih površina nesmetano skupljaju putem kanala sa slivnim rešetkama, odvođe do taložnika, nakon taloženja iz druge komore odvođe do separatora ulja i masti te preko monitoring okna odvođe do recipijenta, rijeke Spreče.
 - 3.4. Da se redovno vrši monitoring prečišćene otpadne vode iz okna za monitoring shodno članu 19. i 20. Uredbe o uslovima ispuštanja otpadnih voda u okoliš i sisteme javne kanalizacije, te pojedinačne i zbirne godišnje izvještaje dostave Agenciji u skladu sa članom 23. iste Uredbe.
 - 3.5. Izvještaje o ispitivanju i ocjeni kvaliteta otpadnih voda može uraditi isključivo laboratorija ovlaštena od strane Federalnog ministarstva poljoprivrede, vodoprivrede i

šumarstva po osnovu člana 64. stav (3) Zakona o vodama i Pravilnika o uslovima koje moraju ispunjavati referentne odnosno ovlaštene laboratorije za ispitivanje voda, sadržaju i načinu davanja ovlasti („Službene novine Federacije BiH“, broj 14/10, 14/13 i 26/14).

3.6. Prečišćene otpadne vode, prije ispuštanja u recipijent, moraju ostati u maksimalno dopuštenim granicama definisanim u Prilogu 27. Uredbe o uslovima ispuštanja otpadnih voda u okoliš i sisteme javne kanalizacije («Službene novine Federacije BiH», broj 26/20 i 96/20), a ukoliko Vlada Tuzlanskog kantona propiše dodatne (strožije) uvjete za ispuštanje otpadnih voda u površinske vode, od uvjeta definisanih u Prilogu 27. Uredbe o uslovima ispuštanja otpadnih voda u okoliš i sisteme javne kanalizacije, podnosilac zahtjeva je u obavezi iste zadovoljiti.

3.7. Korisnik objekta je obavezan pridržavati se svih mjera i uslova propisanih u saglasnostima i dozvolama izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.

3.8. Da se, u skladu sa propisima iz oblasti zaštite okoliša, vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).

3.9. Sadržaj (mulj) iz postrojenja za prečišćavanje otpadnih voda i ostali otpad ne smije se odlagati na česticu „vodno dobro“, odnosno u vodotoke i na njegove obale.

3.10. Da se istrošena ulja, nauljene krpe i sav opasan otpad koji će nastati na prostoru postrojenja za spravljanje betona i betonske smjese redovno prikuplja i propisno, privremeno skladišti u metalne spremnike, do krajnjeg, ekološki prihvatljivog zbrinjavanja od strane ovlaštene organizacije, a prema sačinjenom ugovoru.

4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.

5. Ukoliko radom predmetnog poslovnog objekta za koji se izdaje ova vodna dozvola dođe do promjene režima površinskih i podzemnih voda, a te promjene prouzrokuju štete ma kakvog karaktera, korisnik objekta je dužan uzroke štete otkloniti, a nastale štete nadoknaditi.

6. U periodu važenja ove dozvole, pravno lice je dužno provoditi sve mjere i aktivnosti propisane istom

7. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.

8. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina od dana pravosnažnosti ovog rješenja.

9. Ovo rješenje o vodnoj dozvoli može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

O b r a z l o ž e n j e

Pravno lice „Sagra“ d.o.o. Gračanica obratilo se ovoj Agenciji sa zahtjevom za donošenje rješenja o vodnoj dozvoli za ispuštanje oborinskih onečišćenih voda i aktivnosti koje mogu privremeno ili trajno degradirati kvalitet voda ili ometati poboljšanje njihovog postojećeg kvaliteta u toku rada postrojenja za proizvodnju betona izgrađenih na zemljištu označenom kao k.č. broj 3236/1 i 3236/4 K.O. Stjepan Polje, Grad Gračanica.

U provedenom postupku, uz zahtjev za izdavanje vodne dozvole dostavljena je i pregledana slijedeća dokumentacija:

A. Opća dokumentacija

- Rješenje o izmjenama podataka, broj: 032-0-Reg-11-002933 od 21.02.2012. godine izdato od strane Općinskog suda u Tuzli – ovjerena kopija,

- Uvjerenje o poreznoj registraciji od 15.01.2008. godine izdato od strane Kantonalnog poreznog ureda u Tuzli – ovjerena kopija,
- Uvjerenje o registraciji/upisu u Jedinstveni registar obveznika indirektnih poreza, broj:04/1-UPJR/1-601-2/08 od 04.02.2008. godine izdato od strane Uprave za indirektno-neizravno oporezivanje Banja Luka – ovjerena kopija,
- Rješenje o odobrenju za građenje, broj: 06AB-004 od 28.02.2022. godine izdato od strane Službe za prostorno uređenje, geodetske i imovinsko-pravne poslove Grada Gračanica – kopija,
- Rješenje o vodnoj saglasnosti, broj:UP-I/25-2-40-131-2/21 od 21.04.2021. godine izdato od strane Agencije za vodno područje rijeke Save, Sarajevo - ovjerena kopija,
- Dokaz o uplaćenju federalnoj upravnoj pristojbi na zahtjev

B Tehnička dokumentacija

- Glavni projekat sakupljanja, tretmana i ispuštanja tehnoloških otpadnih voda za objekat betonare „Sagra“ d.o.o. Gračanica-Stjepan Polje, urađen od strane TQM d.o.o. Lukavac, broj:556/21 februar 2021. godine,

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 12. stav 5. i 6. Pravilnika o sadržaju, obliku, uvjetima i načinu izdavanja i čuvanja vodnih akata („Službene novine Federacije BiH“ broj 31/15, 55/19, 41/20, 63/22) izvršen je uviđaj na prostoru proizvodnog pogona betonare sa pratećim sadržajima „Sagra“ d.o.o. Gračanica izgrađenih na zemljištu označenom kao k.č. broj 3236/1 i 3236/4 K.O. Stjepan Polje, Grad Gračanica i tom prilikom sačinjen Zapisnik o izvršenom uviđaju broj: UP-1/21-3-40-299-2/22 od 13.09.2022. godine.

Na osnovu dostavljene dokumentacije, izvršenog uviđaja na licu mjesta utvrđeno je sljedeće:

- Pogon za proizvodnju betona sa pratećim sadržajima izgrađen je na parceli označenoj kao k.č. 3236/4 i 3236/1 upisane u K.O. Stjepan Polje, Grad Gračanica.

- Osnovna namjena ovog objekta je proizvodnja betona, koji se u svježem stanju u namjenskim transportnim sredstvima (mikserima) isporučuje kupcima. U predmetnom poslovnom objektu proizvodi se cca 50 m³/h mase betona.

- Na prostoru betonare instalirani su sljedeći sadržaji: 3 silosa za skladištenje cementa, zvijezda boksovi za skladištenje različitih frakcija agregata, vaga za beton, vaga za doziranje aditiva, automatska vaga za vodu, pužni transporter za cement i agregate, kompresor, oprema za pripremu mješavine za spravljanje svježeg betona, postrojenje sa elektroopremom za upravljanje betonarnom. Na vanjskom radnom krugu i u neposrednoj blizini betonare nalaze se sljedeći sadržaji: parking površine P= 300 m², plato za pranje motornih vozila (automikseri i dr. vozila) površine P=100 m², interne saobraćajnice, plato za izradu i skladištenje gotovih proizvoda, blokova i dr. betonske galanterije (betonske gredice, elementi za dimnjake i sl.) površine P= 280 m², odgovarajuća kanalizaciona mreža i objekti za tretman otpadnih voda.

- Voda za rad postrojenja obezbijedena je putem priključka na mjesni vodovodni sistem.

- Tehnološke otpadne vode koje nastaju pri pranju vozila-miksera, pranju dijelova procesne opreme, vode od pranja platoa za utovar betona i dr. prikupljaju se vanjskom kanalizacijom i odvode do objekta za prikupljanje otpadnih voda- trokomornog betonskog taložnika zapremine cca V=21,00 m³ (cca 4,2x2,5x2,0 m). Istaložena voda iz druge komore se putem recirkulacijske pumpe vraća u proces proizvodnje svježeg betonske mase.

- Dio vode se iz druge komore preko preliva se preliva u treću komoru te nakon toga odvodi na tretman u separator ulja i masti, nazivne veličine 30 l/s (u skladu sa BAS EN 858).

- Na taložnik i dalje na separator ulja i masti su priključene i vode sa radno manipulativnih površina i parking prostora.

- Nakon tretmana na separatoru ulja i masti vode se preko monitoring okna upuštaju u rijeku Spreču.

➤ Skladištenje tečnih goriva, masti, hidrauličkih ulja te popravka i servisiranje mehanizacije se ne vrši na lokaciji betonare.

Na osnovu dostavljene dokumentacije i utvrđenog činjeničnog stanja, a u svrhu smanjenja negativnih uticaja predmetnog objekta i aktivnosti na stanje voda i vodni režim, podnosiocu zahtjeva su ovom vodnom dozvolom propisani uslovi u skladu sa odredbama člana 116. Zakona o vodama i članova 12. i 13. Pravilnika o sadržaju, obliku, uslovima, načinu izdavanja i čuvanja vodnih akata i Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH”, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH”, broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva „Sagra” d.o.o. Gračanica ispunio minimum uslova za izdavanje vodne dozvole za ispuštanje otpadnih voda i aktivnosti koje mogu imati specifične uticaje na vode sa lokacije proizvodnog kompleksa objekata betonare, sa pratećim sadržajima, izgrađenog na zemljištu označenom kao k.č. broj 3236/1 i 3236/4 K.O. Stjepan Polje, Grad Gračanica te je riješeno kao u dispozitivu ovog Rješenja.

Podnosilac zahtjeva je uplatio upravnu taksu u iznosu od 70 KM u skladu sa Zakonom o izmjenama i dopunama zakona o federalnim upravnim taksama i tarifi federalnih upravnih taksi („Službene novine Federacije BiH”, broj 06/98, 8/00, 45/10 i 43/13). Podnosilac zahtjeva je uplatio i posebne troškova koji su nastali u toku vođenja upravnog postupka, u skladu sa članom 127. Zakona o vodama („Službene novine Federacije BiH”, br. 70/06) i članova 4. do 7. Pravilnika Agencije o naknadi posebnih troškova u postupku izdavanja vodnog akta, prema Zaključku ove Agencije broj UP-1/21-3-40-299-3/22 od 14.09.2022. godine.


Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja. Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obrađivač akta:

mr Selma Merdan, dipl.inž.geol.

Prilog: Tehnička dokumentacija navedena pod tačku B obrazloženja rješenja

Po ovlaštenju
Rukovodilac sektora za izdavanje vodnih akata

Haris Ališehović, dipl. inž. građ.

Dostaviti:

- „Sagra” d.o.o. Gračanica
- Stjepan Polje b.b., 75324 Gračanica, (kao u prilogu),
- AVP Sava, ISV – Vodna knjiga,
- Sektor 50,
- ☉ Sektor 40, arhiva,
- Oglasna ploča-AVP Sava